

四庫全書

集部

欽定四庫全書

集部

會昌一品集卷十二至
四

詳校官監察御史_臣范衷

檢討_臣何思鈞覆勘

總校官庶吉士_臣倉聖脉

校對官編修_臣勵守謙

謄錄監生_臣杜文海

欽定四庫全書

會昌一品集卷十二

唐 李德裕 撰

雜狀

論儀鳳以後大臣褒贈狀

故中書令郝處俊

右儀鳳元年八月高宗將傳位於天后處俊對曰天下者高祖太宗之天下也非天皇之天下也天皇只合謹

守宗廟傳之子孫誠不可持國與人有私於天后其事遂止處俊後子孫為酷吏所害

故文昌右相岑長倩

右天授初鳳閣舍人張嘉福與王慶之等率數百人連名上表請立武承嗣為皇太子長倩與地官尚書格輔元竟不署名以中宗在東宮不可更立武承嗣言詞切直仍責上書者遣散為承嗣所害

故御史大夫同鳳閣鸞臺平章事格輔元

右張嘉福請立武承嗣為皇太子天后問輔元輔元固稱不可為武承嗣所害

故右衛將軍李安靖

右天授年王公百僚皆勸革命安靖獨義形於色及被收下獄來俊臣詰其反狀安靖謂曰以我是唐家老臣須殺任殺若問其謀反實無可對為俊臣所害

故贈越州都督徐有功

右當天后革命之初宗室英賢將相舊老忠於國者相

繼受誅徐有功自司刑丞累遷至司刑少卿數議大獄
務在平恕凡所濟活者數百家前後奏雪枉破家者三
經斷死而執志不渝兼明玄宗外祖母龐氏之寃開元
中贈越州都督就第弔祭贈物三百段一子官

兼明一作兼雪

就第一
作就家

以前臣等伏見元和以來褚遂良狄仁傑張柬之等
子孫累有恩制授惟此數家未蒙甄錄望各訪求子
孫承嫡者特受一官如先未有謚者各令有司定謚

如無子孫特與追贈所貴百代之下再振清風海內
忠良無不感厲未審可否吏部狀准制請復舊官爵

故循州司馬杜元穎

二狀

右臣等商量杜元穎雖失於馭遠致蠻寇內侵然握節
嬰城舍生取義圍解之後懲貶不輕但以蠻夷之情不
可開縱若為之報怨以快其心則是不貴王臣取笑戎
狄漢景所以聞鄧公之說恨鼂錯之誅元穎長慶之初
首居宰弼潔廉畏法忠盡小心雖無光赫之名頗著直

清之稱既逢昌運合與申冤望却還舊官階等仍追贈
右僕射未審可否

第二狀奉宣令更商量奏來者

右臣等商量比聞外議皆以元穎不能綏撫南蠻又無
備禦責此二事以為愆尤臣等究其情由實有本末緣
韋臯久在西蜀自固兵權邀結南蠻為其外援親昵信
任事同一家此時亭障不修邊防罷警若後人加置一
卒繕理一城必有異詞便乖隣好自武元衡以後三十

餘年戎備落然不可獨責元穎蠻退後京城傳說驅掠
五萬餘人音樂伎巧無不蕩盡緣郭釗無政都不勘尋
臣德裕到鎮後差官於蠻經歷州縣一一勘尋皆得來
名具在案牘蠻共掠九千人成都郭下成都華陽兩縣
只有八千人其中一人是子女錦錦雜劇丈夫兩人醫
眼太秦僧一人餘並是尋常百姓並非工巧其八千九
百餘人皆是黎雅州百姓半雜獠臣德裕到鎮後移
牒索得三千三百人兩番送得與監軍使於龍興大慈

寺點閱並是南界蠻獠緣朝廷寵待如舊從此蠻心益驕今西川節將惟務姑息臣等所以薄元穎之過謂合追榮頻承顧問不敢不縷悉聞奏況元穎歿後五經大赦下位卑官皆得追復官爵倘聖旨以贈與為優望只准赦文却還舊爵其贈官落下未審可否

論太和五年八月將故維州城歸降准詔却執送本蕃就戮人吐蕃城副使悉怛謀狀

右臣頃蒙先朝授劍南西川節度使其悉怛謀雖是吐

蕃酋長久樂皇風將彼堅城降臣當道臣差行維州刺
史虞藏儉便領兵馬入據其城飛章以聞先帝驚喜其
時與臣仇者望風疾臣遽興疑言上罔宸聽以為與吐
蕃盟約不可背之必恐將此為詞侵犯郊境遂詔臣却
還北城兼執送悉怛謀等令彼自戮復降中使迫促送
還昔白起殺降終于杜郵致禍陳湯見按是為郅支報
仇感嘆前事愧心終日今者幸逢英主忝被台司輒敢
追論伏希省察且維州據高山絕頂三面臨江在戎虜

平州之衝是漢地入邊之路初河隴盡沒唯此州獨存吐蕃潛將婦人嫁與此州門子二十年後兩男長成竊開壘門引兵而入遂為所滅號無憂城從此得併力於西邊更無虞于南路憑陵近甸旰食累朝貞元中韋臯以經畧河湟此城為始盡銳萬旅急攻數年吐蕃愛惜既甚遣其舅論莽熱來救雉堞高峻臨衝難及於層霄鳥徑屈蟠猛士多縻於礮石莫展公輸之巧空擒莽熱而還及南蠻負恩掃地驅劫臣初到西蜀衆心未安外

揚國威中緝邊備其維州熟臣信令乃送款與臣臣告之以須俟奏報貴探情偽其悉怛謀等尋帥城兵并州印甲伏塞途相繼空壘來歸臣即大出牙兵受其降禮南蠻在列莫敢仰視況西山八國隔在此州比帶使名都成虛語諸羗久苦番中徵役願作王人自維州降後皆云但得臣信牒帽子便相率內屬其蕃界合水棲雞等城既失險阻自須抽歸可減八處鎮兵坐收千餘里舊地臣見此有莫大之利為恢復之機所以面許奏聞

各加酬賞臣自與錦袍金帶顓俟朝旨且吐蕃維州未降以前一年猶圍逼魯州以此言之宜守盟約況臣未嘗用兵攻取彼自感化來降又沮議之人宜思事實犬戎遲鈍土曠人稀每欲乘秋犯邊皆須數歲聚食臣得維州逾月未有一使入疆自此之後方應破膽豈有慮其復怨鼓此游詞臣受降之初指天為誓寧忍將三百餘人性命棄信累表陳論乞垂矜舍答詔嚴切竟令執還加以體被三木輿於竹畚及將即路冤叫嗚呼將吏

對臣無不隕涕其部送者更遭蕃帥譏誚云既以降彼何須送來乃却將此降人戮於漢界之上恣行殘忍周固攜離至乃擲其嬰孩承以槍槊臣聞楚靈誘殺蠻子春秋明譏周文收送鄧叔簡冊致貶況乎大國負此異族塞忠款之路快凶虐之情從古以來未有此事伏惟仁聖文武至誠大孝皇帝陛下振睿聖之宏圖得懷徠之上策故南蠻申請朝之願北庭效款塞之誠臣實痛惜悲怛謀等舉城向化解辦歸義而未加昆邪之爵不

賞庶其之功翻以忠愛受屠為仇讐所快身遭此酷名又不彰職由愚臣陷此非罪雖時更一紀而運屬千年臣所以具陳根本不憚繁細冀蒙睿鑒追獎忠魂伏乞宣付中書各加褒贈冀華夷感德幽顯伸冤讐既往之倖心激將來之峻節臣無任懇願之至

論救楊嗣復李珣陳夷直

三狀

右臣等聞向外傳說紛然陛下皆遣中使未測其由臣等相顧憂惶不知死所嗣復等所涉論實負聖明臣等

所以顯書其罪不為末減只望上於竄逐用戒羣邪古人稱刑人於市與衆共棄陛下若以嗣復等罪狀必不可容伏望且降使臣就彼鞠問待得其罪顯戮不遲即便遣使必貽後悔文宗只緣貶宋申錫更不按問至今人以為寬臣等於嗣復等實無情故所利者宗社所惜者聖明不欲令一事駭聽失天下之望若使四方將相或以此為詞臣等避罪不言無以塞責伏望陛下特回宸慮下納愚忠臣等餘年方敢自保陛下若以臣等事

君不盡情涉容奸先罪臣等實所甘分輒陳肝血不避嚴誅不任懇切兢皇之至謹俯伏待罪望速降敕旨

第二狀

右臣等適以有狀論奏未奉聖旨今向外之心驚駭不知所為臣等若苟務偷安不更冒死陳奏必恐旬月之後人情皆以為寃陛下此時追悔無及臣等昨者商量之初只以嗣復等所涉議論不可令在藩鎮止於貶責足以塞辜如更過於此實搖動天下之心必損聖明之

德如以臣等情涉顧望伏望先罪責臣實所甘分臣等專在中書伏望特開延英賜對得面陳肝血死無所恨

第三狀

右臣等適再已陳奏未奉聖旨伏見貞元初宰臣劉晏緣德宗在東宮時涉動搖之論竟以此坐死旋則朝廷中外皆以為冤兩河不臣之地悉恐亡懼德宗尋亦追悔官其子孫近則宋申錫涉交通藩邸貶官文宗尋又追悔至于流涕如嗣復等螻蟻之命至細至微特賜矜

全必彰聖德天下臣子孰不上感天慈不爾恐四海人情自此憂懼臣等亦兢危不暇無以裨助聖明伏望特開延英賜臣等面陳血誠以安中外如蒙聖慈納臣等愚懇伏望更重貶官所冀人心允愜

張仲武寄回鶻生口駝馬狀

右臣等舊讀實錄不至遺忘伏思累聖以來未有此例謹按左傳諸侯不相遺俘昔魯受齊俘見譏左氏諸侯尚為非禮況在台臣臣等忝備鈞衡須謹繩墨若苟受

私遺不守舊章則何以上戴聖君儀刑百辟伏望聖恩
盡許却還從此便為故事仍望許臣與一書報答令其
深諭國體其書草續撰進上以聞

前試宣州溧水縣尉胡震

右胡震博通六經華皓一志家在海郡筋力未衰臣童
幼之時於震受業豈謂年逾四紀位列三公雖自君恩
亦因儒訓臣伏以元和二年前楊州士曹叅軍薛玄造
緣與臣亡父授經具表論薦憲宗授越州諸暨縣令臣

幸因家門舊事輒敢薦聞伏希聖慈特受浙東管內一官所冀臣報其舊恩獲繼先志既顯華門之士實為儒者之榮臣不任懇款兢皇之至

奉宣卿官至將相不忘本師朕深所嘉歎宜依所奏
論河東等道比遠官加給俸料狀

右河東等道或興王舊邦或陪京近地州縣之職人合為樂只緣俸祿寡薄官同比遠元和六年閏十二月十二日及元和七年十二月二十四日敕河中鳳翔鄜坊

邠州易定等道令戶部加給俸料錢共當六萬二千五百貫吏曹出得平留官數百員時議以為至當自後訪聞戶部所給零碎兼不及時觀察使以為虛折皆別將破用徒有加給不及官人近地好官依前比遠伏望今日以後戶部却與實物仍及時支遣諸道並委觀察判官專判此案隨月加給官人不得別將破用如有違越觀察判官遠貶觀察使奏取進止又選人官成後皆於城中舉債到任填還致其貪求罔不由此其今年河東

隴州廊坊邠州新授比遠官等望許連狀相保戶部各
借兩月加給料錢至支給時除下所冀初官到任不帶
息債衣食稍足可責清廉

請淮南等五道置遊奕船狀

淮南

緣疆界濶遠請
令出三百人

浙西宣歙江西鄂岳

各出二
百人

右訪聞自有還僧以來江西劫殺比常年尤甚自上元
至宣池地界商旅絕行緣所在長吏掩閉道路頗甚怨
嗟望每道令揀前件人解弓弩及諳江路者每一百人

置遊奕將一人須清白強幹稍有見會者克如法造遊奕船船五十隻一百人分為兩番長須在江路來往淮南遊奕至池州界首浙西遊奕至宣州界首江西遊奕至鄂州界首常須每月一度於界首交牌各知界內平安申報本使其下番人便於松江要害處置營不得抽歸使下其糧餉春冬衣委使司差人就營所支給如三度以下擒捉得賊委使司超與職名其官健以下便以賊贓物賞給務令優厚如兩度有賊不覺察遊奕將科

責差替如容縱賊盜不問有贓無贓並委本道差人所
在集衆決殺如賊大段巢穴去處仰數道計會一時掩
捉倘去根本軍將授官酬賞所貴鄰接之地同心叶力
江路盜賊因此斷絕臣等今月二十五日已於延英面
奏伏蒙聖恩允許未審可否

論兩京及諸道悲田坊

右卹貧寬疾著於周典無告常飢存於王制國家立悲
田養病置使專知開元五年宰臣宋璟蘓頲奏所稱悲

田乃闡釋教此是僧尼職掌不合定使專知請令京兆
按此分付其家玄宗不許至二十二年十月斷京城乞
兒悉令病坊收管官以本錢收利以給之今緣諸道僧
尼盡以還俗悲田坊無人主領必恐病貧無告轉致困
窮臣等商量緣悲田出於釋教並望更為養病坊其兩
京及諸州合於子錄事耆壽中揀一人有名行謹信為
鄉閭所稱者專令勾當其兩京望給寺田十頃太州鎮
望給田七頃其他諸州望委觀察使量貧病多少給田

五頃三二頃以充粥飯如州鎮有羨餘官錢量與置本
收利最為穩便若可如此方圓不在更望給田之限各
委長吏處置訖聞奏

會昌一品集卷十二

欽定四庫全書

會昌一品集卷十三

唐 李德裕 撰

制

論田牟請許党項讐復回鶻沒斯部落事狀

右臣等雖不習兵鈐昧於邊事然酌其物理情實可知
伏希聖慈特賜詳覽比者陛下常慮回鶻國中離散未
是實情今據我阿泥伊難珠合等書云比間更無活處

即是實耗又回鶻安孝順云赤心宰相問漢國中看你
回鶻好無足知依倚大國意甚懃懇今若許田牟徇党
項貪利之心不自量力犯必死之慮絕歸款之誠事捷
亦損耗甲兵大虧恩信不成則永為邊患取笑四夷况
窮鳥入懷尚須矜憫遠人慕義曾未犯邊自六月至今
未嘗捉烽戍一人奪党項一物披誠款塞望闕哀鳴昨
者所獻表章詞懇意順棄而不納先務誅夷此不可一
也若回鶻國中無釁種落皆安嗚沒斯叛逆而來郎須

拒絕可汗既自失國牙帳已無攜挈傷殘寄命他所嗚
沒斯等迫於飢困各欲求生田牟執稱背國亡命是去
年為惡徒黨都似與德彛雪屈為党項報讐察其用情殊
非體國此不可二也漢宣帝五鳳中匈奴大亂議者多
曰匈奴為害可因其壞亂舉兵滅之蕭望之對曰宜遣
使弔問救其災患四夷聞之咸貴中國之仁義其後南
單于果是臣服六十年邊境無事今縱不能扶其微弱
豈宜因此幸災此不可三也伏望具詔太原振武排此

騎兵於邊上嚴防侵軼待犯國家城鎮然後以武力驅除若只於党項退渾小有劫奪任部落自相仇報未可助以甲兵常令大信不渝懷柔得所彼雖戎狄必合感恩待張賈使回足知情實仍望詔田牟不得擅出詭計妄邀奇功兼詔仲武不得納將吏惑詞為國生事如蒙允許伏望付翰林酌此意處分

請密詔塞上事宜狀

一據太原奏事官孫儔稱昨來回鶻到橫水柵殺戮軍

人百姓今抽在釋迦泊東約西去可汗三百里未知此
回鶻是耶頡特下為復是可汗遣來今且須以此回鶻
為罪人云不受可汗指揮擅自劫掠邊界請密詔劉沔
與仲武計會先經略此賊如可以討逐事亦有名摧此
一支可汗必自知懼

一比聞公主與可汗常別居帳幕每見漢使去即令將
密意看方便說諭公主知親廟子孫只合死生為國常
須作計自拔歸投國家不合與可汗同行擾亂邊界如

萬一迎得公主亦不得便令赴闕須且留在邊上制置
回鶻縱力不能及只要假公主名號制服蕃人

一又慮回鶻於山外安置老弱家口將精兵逼近城柵
攪擾百姓如有此事即須堅壁清野不得與戰其小城
堡兵力薄少不堪固守處並望抽入大城回鶻縱得小
城亦無用處即別選驍將潛出兵掠其家口輜重此最
是制勝之術

右謹件如前望各賜密詔潛令以此為意

請賜回鶻盟沒斯等物詔

右此者只待張賈使回今到已數日須早發遣緣回鶻
已入邊界未測多少天德兵力寡少須務懷柔伏以自
古禦戎只有二道一是厚加撫慰二是以力驅除此事
利害較然前古皆有明効漢宣帝厚撫呼韓大享其利
邊境六十年無事漢武力制匈奴海內疲弊生人減半
今盟沒斯若不稍加恩意令盡歡心須至以力驅除必
恐永為邊患假使其衆殘破摧伏不難亦須先加以恩

不令疑貳古人云將欲取之必固與之正謂此也臣等
商量縱不與糧食接借其賜物不可太薄若止於只賜
特勤宰相實恐發遣未得須是稍令優厚於朝廷若無
費損可以保全朝野羣情皆望如此伏希聖慈特賜察
納

請於太原添兵備狀

右緣嗚沒斯等奉國殘破未有所歸逗留塞上今已歲
周雖近有恩賜喻其歸還然奉蕃未寧時屬寒洳馬畜

羸乏必難首途回鶻和好多年忠効久著雖在邊境之內計無侵軼之虞臣等所慮吐蕃變詐多端不可測度或謂朝廷方備北敵未暇西防或云嵬沒斯招米點汗回鶻乘此機勢謀陷豐州緣元和十三年已曾此來不可無備太原兵額雖存皆被軍將放却散諸處緩急點集至難臣等商量請發陳許步軍三千人鄭滑步軍三千人令至太原屯集如北邊有警則大同軍正當賊路足應事機如河西有虞便令取嵐石路過河至亦近便

況兩道人心忠義微發不難只如一年防秋無所損費臣等詢於物議皆願有此隄防伏惟聖明特賜允納

請遣使訪問太和公主狀

右伏以元和中回鶻累請和親憲宗不許至長慶初穆宗以北庭代結姻好中國無虞邊境晏然生人受福所以割慈下嫁用示懷柔今回鶻國已破亡公主未知所在若不遣使訪問慰其艱危戎狄必謂國家降主北庭本非愛惜便懷輕易之意永無敬重之心非止甚傷邊

情實亦負於公主臣等商量望令苗稔將一二十騎輕
賫詔書先至盟沒斯處令其轉差人送入至公主所在
若盟沒斯便受朝旨固表恭順之心若辭拒此行足彰
背叛之跡因此偵察無所隱情伏希聖旨特賜省察

論幽州事宜狀

右臣等今月五日於紫宸陛下訪問劉約事宜令臣等
亦與君賞一書諭以此意臣等將謂君賞久在河朔諳
練戎機遠授規模必副聖意君賞只合自出已意潛道

款誠事從乖張泯然無跡豈有將朝廷密旨顯示亂軍
激其悖心致此章表兼見君賞與張絳手疏詞甚卑遜
非惟失將師之體實亦失忠藎之誠近者何重順未得
節制初遣茂復諭旨又遣執方致書臣等兩度令元蹇
申意料重順豈不知是朝廷密諭然竟無大將軍表終
守恭順之詞所以授之有名不索朝典幽州一方自朱
克融留連中使不受賜衣繼以楊志誠累遣將吏上表
邀求官爵自此悖慢之氣與鎮魏不同今若便與書諭

實為朝廷之恥伏望且逗留旬月更候事宜克恭廉回
日伏望不賜詔書庶全事體

請令符澈與幽州大將

若訪聞張仲武是幽州大將張朝先之子沉勇有謀陞
下縱欲加恩亦須且挫其氣又幽州旬月之內移易三
人因此翻覆多端亦要令其知愧臣等商量且望令符
澈與大將已下一書觀其報答詞理足以知其情出鄰道
節將於國體無虧其書白謹同封進

條疏太原以北邊備事宜

一雲州之北並是散地備禦之要繫把頭烽今符澈雖修繕已畢把頭烽內並未添兵鎮守事同虛設恐不應機未廢把頭烽以前把頭烽後併合抽却望令巡邊使速與符澈計會却抽舊兵依前制置如舊兵已少即與太原城下及閑處抽兵其與山東連接處及西北鎮兵不在抽限如更要築堡城亦委逐便制置

一三受降城相去四百里自置天德軍及振武節度其

東受降城中並在腹內都無大段兵馬鎮守就中中受降城不過三五十人古城摧斷都不修築今敵衆在陰山之北山中盡有過路若突出山南便入二城即天德振武當時隔斷其中受降城本是突厥拂雲祠最是要地今天德人力不及望令太原振武共出三千人速與修築便令鎮守即天德形勢自壯虜騎不敢窺邊

一東受降城緣是近年新築城內無水城外取金河水充飲又於城西門掘一二十井若被圍守即須困感今

築月城護取井水其張仁愿舊城頗當要害張惟清錯奏恐黃河侵壞先賢制置皆有神靈保持廢來二十年基址依舊園蔬樹木至今盡在隔河便是勝州相去數里望委巡邊使與劉沔計會如何却復舊城至為穩便以前件臣等伏以回鶻在邊切須有備邊備既壯制置不難訪問利害大約如此其要切須得使臣專往自驗機宜謹具條疏如前其間條疏不盡者望委巡邊使與所在節度使商量聞奏謹具於前條疏應接

天德討逐回鶻事

一請速降中使齎敕至雲朔天德已來宣諭生熟退渾
及党項諸部落等待天德交鋒後任隨便出軍討逐如
得羊馬錢物奴婢等任便奉主自收官中更不尋問仍
據殺戮回鶻多少別議優賞

一自古出師皆有副貳以防主將有故便須得人石雄
驍勇善戰當今無敵望授天德軍都防禦副使兼馬步
都知兵馬使助田牟攻討仍勒乘遞赴天德軍

一田鵬藥羅葛元政馬價絹望且勒留在振武令中使與忠順同檢點收管如田牟已用兵其藥羅葛元政便望委忠順收錄如請歸降仍作般次送付太原除首領外委劉沔且散配儀沁嵐石等州去塞遠處安置並官給糧食如不肯降即須收係待後處分其趙進用等亦望詔劉沔收管其首領於公館安置長行等散配諸處

一田牟都似不曉兵機奏狀已出三千人拒回鵬計其兵數必是全軍盡出忽有不利城內宣免空虛馬上馳

突是戎狄所長攻城圍守戎狄所短田牟只合堅守城
壘以俟救兵望速詔田牟輒不得出兵野戰待諸處兵
至方可逐便討除

一回鶻馬軍難於支敵依林守險須用勁弩望於浙西
取弩手三百人令取河曲路赴天德如所在逢回鶻便
令把隘及依叢林射馬河曲路與天德直對兼經歷鹽
夏等州所在要處便堪應急到天德後權取田牟指揮
一盟沒斯誠款雖未知真偽然早要別加官爵縱使不

誠亦是反間且要獎其忠義為討伐之名令遠近諸蕃知朝廷只是責可汗犯順非是要滅回鶻

一回鶻既乏糧食又累年勞苦人心易動必可招降望且遣田牟速招降者許以優賞如有降人旋給糧食遞過太原取優賞不得留在天德兼並聞

以前臣等商量若待天德奏到已恐不及事機望付翰林各撰密詔令中使向前審詳事勢如已接戟便須准此處分如蒙允許其石雄便須今日降敕未審

會昌二年四月十八日緣田牟不待朝
旨已出兵拒可汗下兵馬故有此處分

論盟沒斯特勒等狀

右自回鶻近邊人情疑恐聖德所感威懷克宣果得盟
沒斯望闕歸心率徒効命必在優賞昭示四方使戎狄
遠聞皆感恩信望降中使宣慰盟沒斯特勒及王子等
并多攬將軍共七人望各內賜錦綵銀器其盟沒斯下
兵馬望賜米五十石度支給絹三千匹以戶部物克度
支速差人般送仍許不分散部落待委知事情續議制

論溫沒斯下將士二千六百一十八人

右溫沒斯下將士既與衣糧又加冠帶賜其軍號實壯
邊聲撫循其人莫切於此臣等商量望賜號歸義軍仍
望翰林賜敕書宣示溫沒斯下歸義軍將士等其溫沒
斯望且令兼克歸義軍使如蒙允許便添入加工部尚
書制宣行仍與中書門下勅牒

論天德軍捉到回鶻生口等狀

右臣等見今日天德軍奏事官王可度云每有回鶻投

降及城來捉得十人五人緣不敢留在軍城間得事情
後便皆處置伏以回鶻窮困情亦可憐屢有殺傷恐傷
仁化望付翰林賜田牟仲武詔前後更有此類便遞送
太原令配在諸州安置稍為允愜未審

請賜唃沒斯槍旗狀

右唃沒斯既加軍號甚壯邊城錫以牙旗尤彰寵異臣
等商量望依神策諸城鎮使例賜以旗兩口豹尾兩對
器械并刀一副令中使押領宣賜如以中使行速齋持

稍難其搶旗令於太原節度使下揀新好者充賜亦穩
便謹錄奏聞

論唃沒斯家口等狀

右唃沒斯既加軍號請留家口在太原安置與諸弟等
苦處先登者臣等商量唃沒斯赤誠向闕極力捍邊請
遣宗族盡歸內地非惟絕其顧望足以堅彼闔心望詔
劉沔義忠於雲朔等州揀一空閑城壘兼與隨事造土
屋其唃沒斯及愛耶勿宰相等家口等即與別造壯淨

屋宇安置其應歸漢家口等大口每月給米三斗充糧
食委度支供軍使逐月支給仍委劉沔差漢兵勾當防
援不得令側近部落侵擾

論太原及振武軍鎮及退渾党項等部落牙市
牛馬駱駝等狀

右緣回鶻新得馬價絹訪聞塞上軍人及諸蕃部落苟
利貨財不惜駝馬必恐克為互市招誘外蕃豈惟資助
虜兵實亦減耗兵備望詔劉沔忠順義忠守志等切加

鈐鍵如有違犯並按軍令馬及互市物納官如有糾告
便以所得物克賞

奉宣盟沒斯所請落下馬價絹便賜與可汗穩
便否奏來者

右臣等商量賜可汗甚全國體望付翰林賜可汗書得
盟沒斯表稱在本分馬價絹並合落下請克進奉以可
汗本國破殘久在邊陲此已量與盟沒斯已下本分馬
價絹便賜可汗兼望賜盟沒斯詔獎其忠蓋緣卿率衆

歸國若又落下馬價絹恐可汗與卿結怨轉深事體之間亦慮非便以卿等所請奏進奉馬價絹回賜可汗所冀部落早退令卿等必保安謐望約此意處分實為允

愜

欽定四庫全書

會昌一品集
卷十三

十四

會昌一品集卷十三

欽定四庫全書

會昌一品集卷十四

唐 李德裕 撰

制

論回鶻事宜狀

右臣等累自精慮回鶻自到把頭烽北已是數日奏報
寂然更無侵軼察其情狀只與天德振武界首不殊前
日尚書丞郎鄭肅等皆見臣等懇說且欲曲全恩信告

諭丁寧縱要驅除只可出於邊將常令曲在於彼未要
便與交鋒望更詔劉沔令遣使邀約若事非獲已驅逐
不遲恐劉沔撰書叙朝廷意不盡望付翰林賜劉沔書
白臣等今月一日所商量遣石雄所營事今且駐更審
候事勢仍望兼賜遂泰詔處

請發陳許徐汝襄陽等兵狀

右臣等昨日已於延英面奏請太原振武天德各加兵
備向後不更往來救援伏蒙聖恩許臣等以進狀請更

徵發陳許徐汝襄陽等兵今回鶻雖已抽退康志亮稱
退渾走捉嵐石等州臣等料其必歸靈夏又河曲党項
向與回鶻有讐至河水合時深慮可汗突出過河兼與
吐蕃連結則為患不細深要防虞其所徵諸道兵恐不
可停須要及冰水合時前各到所在謹特具聞奏未審
論回鶻石誠直狀

右自兩日來臣等竊聞外議云石誠直久在京城事無
巨細靡不諳悉昨緣收入鴻臚懼朝廷處置內求奉使

意在脫身又云石誠直先有兩男逃走必是已入回鶻料其此去豈肯盡心臣等伏以自可汗在邊已使苗續王會楊觀三度告諭又曾領常照安魯卿同往逗留塞上終不悛心石誠直是一卑微首領豈能有所感寤況自今夏已來兩度點檢摩尼回鶻又寵待溫沒斯至厚恐誠直之徒必懷疑怨此去豈止於無益實慮生奸伏望速詔劉沔所在勒回實為允愜仍望兼賜崔巨玄詔

論振武以北事宜狀

右緣回鶻牙帳漸移向東去振武疆界稍近今以草青馬壯深慮有意窺邊望令劉沔於雲伽關及邊界要害添兵嚴加警備先令鄭許陳滑兩道兵馬於代州就糧今緣把頭烽北一川皆是散地若回鶻萬一馳突更無重兵備禦則退渾部落先被破傷太原北境不免騷擾望付翰林賜劉沔詔令酌量事機審探回鶻情偽更於把頭烽北添置令速詳利害聞奏如蒙允許伏望約此意撰詔處分未審

一回鶻猶在雲州頗擾邊境據二州蹤跡必無深遠之謀所慮邊上奸人走投回鶻為其設計今在雲朔等州斷天德振武驛路切須有備防患未萌望速令度支差使於河西路潛為准擬

一元和八年回鶻邊磧南支取柳谷路打吐蕃天德防禦使周懷義奏到朝廷未測其故人情無不憂恐臣德裕先陳奏請自夏州至天德復置廢館十一所以通急驛又請發夏州兵士五百人於故經略軍應接驛路兼

護党項臣等未知此路舊館今已廢毀為復猶有存者
望使忠順詔於此路量事再修舊館以通天德奏事疾
路

一訪聞麟勝兩州中間地名富谷人至殷繁蓋藏其實
望令度支揀幹事有才人充和糴使及秋收就此和糴
於所在貯蓄且以和糴為名兼令與節度使潛計會設
備如萬一振武不通便改充天德軍運糧使勝州隔河
去東受降城十里自東受降城至振武一百三十里此

路有糧束可以壯振武西可以救天德所冀先事布置
即免臨時勞擾

驅逐回鶻事宜狀

右臣等累日商量且如八月九日處分太原三道各嚴
兵守備更令劉沔遣使告諭待至來春回鶻人馬羸困
之時計會驅逐則漢兵免冒寒苦易為施力臣等思慮
量為得計若如此可行即幽州兵馬望且令於奔界屯
集待候處分入太原界後即須供出界糧未有用處日

費殊廣恐度支物力供饋不辦若慮永合後回鶻更有
馳突事當及早驅逐即須速為計會至十月已後寒凍
轉甚恐施力不得須便三五日內方及事機又緣太原
步兵鈍弱素為河朔所輕兼本道奏事官孫察孫儔自
稱太原兵敵回鶻不得即須於河朔側近別徵兵滿取
萬人方可濟事須令一兩月內便見成功如此即免費
資財得早安邊境伏以自兩漢每四夷有事必令公卿
集議蓋以國之大事最在戎機元和中征討王承宗李

師道長慶中征討李齊並令集議况聞向外議論不一互有異同若不一度遍詢羣情終為間詞所撓望令公卿集議兩日內聞奏所與博盡羣議厭服衆心未審

公卿集議須便施行其中有未盡處須更令分
析聞奏謹具一一如後狀

一議狀云選將練卒未甚得人今緣邊節鎮將下羣守
誰人最不稱職文武班中誰人堪任將帥須指陳其事
不得泛言

一又云守禦要害未甚有備犄角之設不相應輔車之謀不相依今何處置兵即為要害何處加備即為相應並須指言去處

一又云來即驅逐去亦勿追昨所令集議出師驅逐去亦勿追如此相守何時得了軍糧日有所費邊境終無安寧此最關取舍大計須便堪行用

一又云部落能自攻討者不須止遏而邊上諸蕃多者一二千帳少者力又不足各有家口畜產常自護惜昨

者回鶻暫到雲州諸蕃奔逃不暇雜蕃既無統一誰肯盡心今欲將何部落討逐亦須指言去處

一又云各敕邊將遣自招收其遠征戍卒請漸令抽罷此事朝廷非不素知只緣去年將江淮六道衣糧召募天德官健僅經一年更無一人應募李忠順請自招召經半年只得六百人塞上守備處召得一二千人都未濟事成卒如何抽罷亦須更別陳方略

以前謹具如前昨所降勅旨云且須切應事機不得

更為虛論今詳議狀並未切事機臣等商量望令牛僧孺與夷行同議仔細分析兩日內聞奏未審

牛僧孺等奉勅公卿集議須便施行其中有未盡處須更令分析謹連如前狀

右臣等伏詳公卿所議猶未切要狀云邊將不聞以攻守之術上聞朝廷則將略可知也又諸道徵兵其數不少烏合之衆號令不齊又近者回鶻攻劫雲州漸入內地節級城守莫能式遏亦未見隣近堡柵首尾救援者

竊詳此意只是見大段形勢實未切事機朝廷比來待
遇回鶻惟推恩信諭其職分便自退歸所徵戍兵只合
守備都未嘗有攻討之意昨來回鶻迫於飢困至雲州
劫奪牛羊已為侵暴事須與城柵鬪敵兵法所謂疾雷
不及掩耳便云莫能式遏亦似過誣堡柵既無重兵合
須自守令其首尾救援亦是虛談自古所云烏合之衆
皆謂臨時召募未經訓習如韓信驅市人而戰即是烏
合陳許淄清等兵並是節制之師久經戰伐但令一處

指揮自然號令齊一固不可謂之烏合又云漢兵遠襲
恐遺敵擒兵法云善用兵者致人之師不可自致所謂
致人者是令其自來況敵騎倏忽以來疾如風電固不
合將兵遠襲今可以計者緣其有家口輜重不離漢境
二三百里遠去未得既有定所便可為謀魏武破烏丸
李靖擒頡利皆用此計公卿等都不議及亦似未見形
勢非令集議只緣問驅逐守備二計何先今既云守備
過冬方圖進取斯為上策便可施行即與昨來加劉沔

招撫使且令告諭理亦相近恐不暇更有訪問未審

請發鎮州馬軍狀

右太原奏事官孫儔適到云回鶻移營近南四十里劉
沔料必是緣契丹不同恐襲其背所以移營又幽州進
奏官孫方造云仲武破回鶻之時收得室韋部落主妻
兒昨室韋部落主欲將羊馬金帛贖妻兒仲武並不要
只令殺回鶻監使即還妻兒室韋使已領幽州軍將同
去殺回鶻監使緣軍將未回仲武未敢聞奏據此事勢

正堪驅除臣等問孫儔與幽州合勢向前移營驅除得否更要添多少兵馬孫儔答云若係移營亦不要添大段兵馬只緣大同軍兵少得易定一千人助大同即得其鎮州馬軍臣等商量不用徵發穩便未審

請市蕃馬狀

右訪聞蕃渾羊馬多在渾河川恐啓戎心更來侵掠回鶻未退尤須備邊朝廷比來所乏最在戎馬因此收市深得事機宜收壯馬令入東關保無散失臣等商量望

委劉沔誘論番人緣回鶻常有意劫奪恐番人作主不得應堪服衣甲壯馬並與收市其以太原見貯戶部物充賞價如市收得後旋送樓煩監收管諸道若有欠缺即量賜與如蒙允許望付翰林賜劉沔詔處分未審

請契苾通等分領沙陀退渾馬軍共六千人狀
右奉宣旨思忠請前件馬軍合勢令商量奏來者臣等
商量令劉沔與幽州振武天德合出大軍置營柵漸移
向前逼感即令思忠領蕃渾馬軍深入計思忠兵勢相

及可汗牙帳必自有變兼令招其降者即易成功其蕃
兵分為兩廂各令蕃將押領至為穩便何清朝莫莖通
是蕃人各令管一廂所冀諳識邊情易為指使如蒙允
許其何清朝計行李永遠望便以中書門下帖追未審

李思忠下蕃騎狀

右臣等訪聞退渾與回鶻久為讐怨恐合勢後不與思
忠叶心或生別事須令速泰審與劉沔商量如有可疑
即便假發遣其與唐感義奉臣誠等軍及莫莖退渾等

部落先各有本管都使都督須令部領自去即得兵將各相諳識易於指揮望付翰林賜劉沔忠順遂泰等詔處分

河東奏請留沙陀馬軍狀

右思忠本請蕃騎緣言語相通易於指使若令易定兵去恐不相當魏楚又稱向北進軍每頭軍事須得蕃兵一二百騎引行若全令抽却進軍不得臣等商量沙陀兵望許劉沔量留一半其一半依前令與思忠合勢如

蒙允許望賜劉沔詔處分

請何清朝等分領李思忠下蕃兵狀

右臣等前日商量令莫苾通等不受思忠指揮何清朝
分領部落臨事取思忠指揮昨日奉宣恐莫苾通等不
受思忠指揮不要分領臣等亦有深慮不敢不再陳論
沙陀部落比在太原衙內性至循良於人情狎熟不令
別人管領亦得所若退渾昨者張獻節纔欲責罰便疑
為惡忽恐思忠制御不得却自因此生事莫苾通本是

蕃中王子先在蔚州且遣分領必上下情通更無所慮
又思忠雖志誠效順然使用之初亦未可獨任漢將分
領事亦得宜莫必通等雖是蕃人任使已熟切更誠勵
豈敢不順思忠臣等所見如此伏望聖明裁斷未審

請賜劉沔詔狀

右訪聞劉沔頗練兵機惟臨機決策不免遲疑兵書云
用兵只聞拙速不聞巧遲深恐過為慎重漸失事機望
賜劉沔詔此緣回鶻未為擾侵且務綏懷今既殺俘邊

人驅劫牛馬頻已有詔速令驅除自度便宜臨機應變
不得過懷疑慮皆待指揮朝廷既假以使名令為諸軍
節制邊境之事皆以責成向後或要移營進軍一切自
取機便不必皆候進上未審

請發河中馬軍五百騎赴振武狀

右臣德裕得忠順狀請自至界上親臨賊營專看事機
首為撲滅緣當道軍馬數少請馬軍一千騎臣等商
量緣可汗移營已近振武忠順勇於戰鬪必可指縱河


中地閑馬軍有朔方舊法都虞候闕川防戎臣素所諳

知望發馬軍五百騎令王縱部赴振武取忠順指揮今
當回鶻衰殘亦要及時驅逐事有應變不可憚煩仍望
賜絹一十八百匹內三百匹充職掌人優賞以戶部物
充度支差綱發遣兼望令中使送如蒙允許望付翰林
賜詔處分兼詔示忠順守志其賜忠順狀謹連封未審

李思忠請進軍於保大柵屯集狀

右伏以今年八月制置待諸道進軍移營逼可汗衙帳

即李思忠領行蕃騎深入覆其巢穴續緣劉沔張仲武
確稱冬寒進軍未得請待正初今已及期望詔劉沔張
仲武一時進軍以壯思忠兵馬恐不便令往中受降城
令在保大柵屯集稍為穩便望付翰林賜思忠遂泰詔
意謹同封進



會昌一品集卷十四

欽定四庫全書

集部

會昌一品集卷十五至七

詳校官監察御史_臣范衷

檢討_臣何恩鈞覆勘

總校官庶吉士_臣倉聖脉

校對官編修_臣勵守謙

謄錄監生_臣杜文海

欽定四庫全書

會昌一品集卷十五

唐 李德裕 撰

論用兵

論譯語人狀

右緣石佛慶等皆是回鶻種類必與本國有情紇圻斯
專使到京後恐語有不便於回鶻者不為翻譯兼潛將
言語輒報在京回鶻望賜劉沔忠順詔各擇解譯蕃語

人不是與回鶻親族者令乘遞赴京冀得互相叅驗免有欺蔽未審

請更發兵山外邀截回鶻狀

右緣回鶻既已討除須令殄滅今可汗窮蹙正可梟擒忽萬一透入黑車子部落必恐延引歲月勞師費財望速詔忠順令進軍於山外黑車子去路邀截恐振武軍馬數少其李思忠下沙陀五百騎易定軍馬一千騎便令何清朝押領同去如至陰山北蕃知回鶻猶在舊處

便令從北進軍取背則前後受敵必無所逃未審

殄滅回鶻事宜狀

右臣等商量回鶻衰殘取之在速一切須令三月已前
事了陛下若欲早見功效須激勸人心自古用兵皆懸
賞格以此誓衆人必輕生今因景德等往幽州太原振
武望三道各賜勅書如兵馬使已下大將取得可汗便
授金吾小將軍及大郡刺史賞錢一萬貫如取得宰相
便授兼御史大夫賞錢五千貫若是小將軍長行取得

白身授兼御史中丞賞並准此今可汗與宰相只有四
人直依此酬賞只用二萬五千貫文比一月供軍所費
五分之一如此即得義知勸黠寇無逃伏望出自宸衷
早賜明勅處分未審

李靖傳事狀

貞觀三年突厥諸部離叛朝廷將圖進取以靖為定州
道行軍總管率驍騎三千自馬邑出其不意直趨惡陽
嶺以逼之頡利可汗不虞於靖見官軍掩至於是大懼

四年靖進擊定襄破之可汗僅以身遁頡利可汗退保鐵山遣使入朝謝罪請本國內附又以靖為定襄道行軍總管往迎頡利頡利雖外請朝謁而潛懷猶豫其年二月太宗遣鴻臚唐儉將軍安修仁慰之靖揣知其意謂副將公謹曰詔使到彼敵必自寬遂選精騎一萬齎二十日糧引兵自別道襲之公謹曰詔許其降行人在彼未宜討擊靖曰此兵機也時不可失韓信所以破齊也如唐儉輩何足可惜督軍疾進司師進陰山遇其斥

候千餘帳皆俘以隨軍頡利見使者大悅不虞官兵至靖兵將逼牙帳十五里虜始覺頡利畏威先走部衆因而潰散靖斬萬餘級頡利乘千里馬將走投吐谷渾西道行軍總管張寶相擒之以獻

討襲回鶻事宜狀

右臣等伏見李靖再破頡利可汗方始擒得望付翰林錄李靖傳詔示劉沔曉諭云比者未取却公主與回鶻接戰朝廷力稍不及舍之即易今既取却公主又與回

鵠接戰即須剪除令盡不得遺生後患兼令揀退渾沙
陀共三千騎從排比兼曬取三千人十日乾糧及乾蒸
餅聞塞上五百錢買得一頭牛亦令約人數曬取牛肉
乾脯且如此排比待景度幽州使回令劉沔專差信實
軍將至景度數探問事情如仲武便肯出軍討襲即須
且讓仲武不得爭功如仲武不以詞言悠慢未有去思
即須及塞草未青邊馬羸弱便令蕃軍掩襲必見成功
其李靖傳事謹連奏上伏希聖明採納

論昭義三軍請劉稹勾當軍務狀

右伏以元和中李師道自擅一方久為桀逆及王師壓境天網四陳劉悟頗識轉禍之機乃有納忠之効朝廷獎其歸命寵遇逾渥待以信臣委之雄鎮從諫因父歿自總兵權屬寶歷中政務因循事歸苟且與其符節以紊國章然猶恭守詔條咨訊善道亦修覲禮一至闕庭驟陟台階實非公議爰自近歲頗聚甲兵招致亡命之徒遂成逋逃之藪怵於邪說自謂雄豪及寢疾彌留罔

思臣節又令紀綱舊校誘動軍情樹置駭童再圖兵柄
陛下以澤潞玄宗歷試舊地有上黨故風風俗和平人
心忠義艱難以後多用儒臣又以劉悟功著先朝欲全
其宗族特令供奉官薛士幹宣諭示以聖情而將校繼
有表章未從明命臣等伏思劉悟以師道之逆親自梟
夷誠合示一軍大順之源置子孫於無過之地而乃繼
師道覆車之軌襲怙亂之風此而可容孰不可忍固須
廣詢庭議以盡羣情臣等商量望令兩省御史臺并文

官四品以上武官三品以上於尚書省集議奏未審

李彥佐翼城駐軍事宜狀

右彥佐即至翼城計賊中軍人百姓必有歸降來者彥
佐務推恩信必盡綏懷臣等深慮賊中潛奸人許為降
附人數漸廣必有異謀臣等商量望付翰林詔示彥佐
如有百姓歸降量事優卹各令復業如軍歸降者亦須
各有優賞便令將朝廷意旨轉相招誘逐旋疎理處置
不得留在翼城如軍人已歸降者不許却入賊中即望

於界上別立一營令屯集委彥佐揀幹事車將別將三百人主領仍不與器械並不得令在晉絳界內屯集未審

請賜澤潞四面節度使狀

右臣伏見後漢秦豐叛光武令朱祐盡力攻之至窮困豐乃將其母子九人降祐光武不舍其罪至洛陽斬之大司馬吳漢劾奏祐違詔受降失將帥之任伏以兵未交鋒便能歸順須存大信猶可曲全今劉稹告諭不悛

加兵自備逆命之罪天地不容若至窮蹙歸降並不得受臣等謹錄漢朝故事如前望付翰林錄示元達彥佐劉沔茂元弘敬及義逸行周等詔令准此處分未審

幽州鎮魏使狀

右緣秋氣已至將議進兵幽州須早取可汗鎮魏須速平劉稹各要遣使諭旨兼潛探三鎮軍情今日延英面奉聖旨欲令張賈充使臣等續商量張賈幹濟有才甚諳軍中事體然性稍負氣不安恬恐不如且輟李回充

使如以綱臺不可暫闕即兵部侍郎鄭涯久充戎鎮判官性甚精敏雖無詞辨言亦分明官重事閑最相宜稱未審

請賜弘敬詔狀

右緣令王宰自領陳許兵直抵邢州要詔示元達弘敬諭以河陽太原皆隔山險進軍未得緣卿等已東面進軍賊中惴懼近日頻入晉絳焚燒村舍地邇關輔深要防虞恐昭義知西面進軍稍難偷安旬月令王宰自

領全師直抵磁州以分賊勢望付翰林約此意撰詔未審

論彥佐劉沔下諸道客軍狀

右訪聞諸道客軍皆自有都頭常相顧望不肯効命請依河朔軍法委彥佐劉沔每三二千人分為一團如有應急使用處便點一團令去一切成敗責在都頭如此則人必齊心將必懼法臨機赴敵不敢因循如蒙允許望付翰林各賜詔處分未審

論陳許兵馬狀

右緣魏博討賊遷延頗招物議昨令陳許兵馬直抵磁州此是制敵深謀攻心上策徐廼文到京之後方知陳許發兵便云弘敬全軍自取磁州則是畏懼陳許須待弘敬出軍表到方得委知若便遣王宰罷行亦是姑息太過只緣河陽山險攻討艱難王宰頓軍虛費饋運望密詔示王宰但令從容排比未要速便道途賊中聞此軍聲必合破膽魏博若全師自出續止陳許不遲如蒙

允許望付翰林約此意賜詔處分未審

論河陽事宜狀

右緣河陽奏事官高從真到稱十八日陳後遍山遍谷盡是賊軍茂元兵力寡少頗似危急若賊勢更甚便要退守懷州非惟損挫威聲必恐驚動東洛皆由魏博未有戰陳彥佐又隔深山所以併力南攻不得不虞自元和以來賊中用衆皆取軍寡弱處即併兵用力一處不敵後即移向他處計王宰排比已有次第倘遣全軍便

發救援河陽不止捍蔽洛京足以臨制魏博如恐全軍
費損饋運計王宰必見先鋒望今日降中使賜詔令宜
發先鋒五千人便赴河陽所冀免落奸計事幾至切不
可更遲如蒙允許望賜茂元王宰行敏詔處分

第二狀

右訪聞河陽兵力已竭弓矢皆盡地邇東洛實係安危
向外人臣無不憂恐切望詔王宰發先鋒五千人後須
自領全軍繼進仍望今日內發使賜詔處分河陽所貯

諸道進助軍器械並望且搬賜茂元猶恐器械數少兼望內賜甲一千副弓三千張并弦箭三萬隻陌刀三千口兼聞河陽軍用罄竭賞給不充自出軍以來並未有恩賜望賜絹三萬疋且以河陰見在物委度支差脚速搬送未審

奉宣王宰欲令直抵磁州得否宜商量奏來者右臣等商量昨者緣魏博久未進軍兼涉物議所以請王宰全軍直抵磁州以分賊勢所冀昭義破膽弘敬不

敢逗留令既收平恩殺傷不少便許弘敬自當一面必
見成功然河朔軍情常須以威臨制弘敬一心雖至忠
順終慮將校異端況中外人心皆憂河陽寡弱王宰已
排比兵又頒恩賜且令全軍赴河陽兼得遙制魏博兩
面事勢皆得機宜未審

請賜仲武詔狀

右臣等見李回說仲武似疑劉稹未有罪狀及見李回
說從諫積惡僭侈便忠憤感激告若罪狀如此朝廷固

合誅夷臣等商量因處分邊事望賜仲武書諭以深意
要云從諫入覲之初與鄭注交結因緣貨賄濫授鈞衡
及歸鎮後又與李訓結託所謀狂險中外具悉自訓注
夷滅心不自安頗恃甲兵轉懷悖慢先朝外雖優寵中
實懷疑及從諫疾病之時曾無誠款昨遣中使臨問兼
借名醫矯託異端竟不相見便樹置劉稹令將校繼獻
章表不待朝旨便令繼襲以澤路一鎮有啓聖舊宮艱
難已來多用文吏如抱真首創軍幕於國兼有大功身

歿之後其子皆赴京闕此謂劉稹愚騃迫於軍情望其
愛惜家門稍能悛悔頻敢馳突晉絳侵軼河陽近李丕
投降及魏博收平恩縣得劉稹榜帖並已進來皆呼官
軍為賊逢着即須痛殺悖逆如此天地不容想卿遠聞
應當奮激卿宜速諭諸蕃部落同滅可汗卿但北邊立
功劉稹必當自潰策勲命賞以卿一道為先卿深體此
懷兼示將校如蒙允許望付翰林約此意撰詔未審
請授王宰兼行營諸軍攻討使狀

右緣王茂元雖是將家久習吏事深入攻討非其所長
訪聞東畿自聞狂寇侵軼尚未安定茂元縱得痊復且
要留鎮河陽行營諸軍須便有所委茂元疾雖加重朝
廷亦免他虞前月二十九日延英面奉聖旨亦以兩道
節度同在一處非便臣等商量望授王宰兼行營諸軍
攻討使未審

論石雄請添兵狀

右訪聞冀氏去潞州最近纔二百里已下於此進兵最

當要害翼城亦是大路須備賊奔衝石雄雖兵數已多終是分張處廣便須初允所請方可責其成功今緣西備蕃戎邊鎮不可抽減向東抽發又不及幾訪聞奏事軍將張弘慶云陳許徐泗兵初到行營軍外子弟有一萬人已上緣未有戰陣聞不得已稍却歸本道今猶有少壯堪充戰卒五六千人皆是父子兄弟人心齊一臨時使用絕勝諸軍冀氏去賊最近石雄又至驍勇假其兵力事必速成陛下方集大勲不可更惜小費臣等商

量望賜石雄義逸詔令與陳許徐泗軍外子弟各召二千
人並須揀少壯有武藝堪入戰陣者充仍望約陳許
長行制度支權給衣糧徐泗緣有醬菜望以兩處兵馬
皆在行營事體須同不可獨給如蒙允許望速賜詔示
未審

請問薄仲榮賊中事宜狀

右臣等昨於延英奏請降中使問薄仲榮生口四十人
內幾人是赤頭郎聖意以元達之故不欲更問臣等商

量緣薄仲榮是賊之心腹必盡知謀計終要遣使出城
勘問城中兵馬多少諸界布置防備何處今欲入兵何
處最當要害兼問賊中人情還思歸順否直對鎮州押
衙軍將仔細勘問不要回避必得事情因此不妨便知
生口赤頭郎數元達知勘赤頭郎賊中事宜必不疑慮
因此兼勘河陽魏博生口以此叅驗必知未審

請問生口取賊計策狀

右伏以殘寇未平須廣求良計臣等苟有所見則合上

聞遠則韓信近則李靖皆臨刑免死後立殊勛忽有其人亦不可料望令勘事中使宣問如有奇計秘能必取劉稹或可以反間令自相梟戮及能設計取彼州縣兼招得都頭者並仰速具事由聞奏如計畫明切便堪施行即貸其死命令於諸軍勅命不妨有可採錄或助戎功可否之間在於宸斷

請諸道進軍狀

右緣王宰兵已深入須取澤州又恐賊於萬善向東衝

突須更尅期齊進正月六日並是良日一日雖是歲首亦合軍機緣軍在行營歲日與常日無異賊中有州縣村間隨分必須作歲乘其無備必是成功其兩日伏在聖朝裁定戎事尚密所降中使望計行程令取事前兩日到行營即待又恐賊中困虜即自有變望密詔王宰石雄忠義等聞彼有變便須星夜進兼先差專使與彼大將書具云初經變革須得王師應接以安人心兵馬並不入潞州只在三數十里內下營並不驚擾村間即

當秋毫不犯直須待立功軍出潞州新節度使入後處
置大段公事了方得抽軍其元達弘敬緣隔山東又恐
漏洩此意並望不賜詔示如蒙允許望付翰林各賜詔
處分

論劉稹送款與李石狀

右臣等得李石狀報劉稹潛有款誠伏以王師壓境已
是六月賊境累經侵軼頗肆猖狂今事勢困窮人心思
變因此請命冀逭靈誅望詔李石且與李恬書不得云

已與聞奏但遣將兵屬直界首方敢上聞以此邀之更
觀旬月仍望詔元達弘敬王宰石雄便令齊入切料旬
朔之內必有變生今饋運之費計至春末並足如二月
以來尚未殄滅然後議納其代款事亦不遲如蒙允許
望付翰林各賜詔處分

會昌一品集卷十五